

Ташқи кўринишга қараб баҳо берманг!



11:00 / 23.05.2022 2729

Қоп йиртиқ бўлса ҳам, ичида ширин олмалар бор. Баъзи одамлар эски, ямоқли кийимда бўлсалар ҳам, ичларида олтиндек қалб бўлади. Шунинг учун инсонларга, уларнинг ташқи кўринишларига қараб баҳо берманг.

Саҳобаи киромларнинг кўплари ямоқли кийимда бўлганлар. Лекин ичларида дунёдаги мунаввар, пок қалб бор эди.

Бу саҳобаларнинг ичида Пайғамбарлар алайҳимуссаломдан сўнг инсониятнинг афзали бўлган Абу Бакр Сиддиқ розияллоху анху, адолати билан дунёга машҳур бўлган, тириклигидаёқ жаннат башоратини олган Умар розияллоху анху каби зотлар бор.

Аллоҳ таоло Қуръони Каримда шундай деб марҳамат қилган:

«Албатта, Аллоҳнинг ҳузурида энг ҳурматлийингиз энг тақводорингиздир. Албатта, Аллоҳ ўта билувчидир, ўта хабардордир» (Ҳужурот сураси, 13-оят)

Оятга кўра, Аллоҳ ҳузуридаги улуғлик, ҳурматга сазоворлик, мукаррамлик пул, машина, уй, иш, таниш-билиш, обрў билан эмас, балки, тақво билан, Аллоҳ таолодан қанчалик кўрқиш билан белгиланади.

Ибодатларини, жумладан, намозларини вақтида адо этса, рўзасини ихлос билан тутса, жанозада қатнашса, силаи раҳм қилса, қўшнисига мурувват кўрсатса, ота-онасига яхшилик қилса, аёлига зулм қилмаса, фарзандларига илм, одоб, шариат ҳукмларини ўргатса, зино, ўғрилик, порахўрлик, судхўрлик, ароқхўрлик каби гуноҳлардан тийилса, хуллас, Аллоҳ таолонинг айтганини қилиб, қайтарганидан қайтса, ана шу мусулмон Аллоҳ таолонинг наздида ҳурматлироқ ҳисобланади.

Урва ибн Зубайр раҳимаҳуллоҳ айтадилар: «Мен Оиша онамиз розияллоҳу анҳонинг 70 минг дирҳам садақа қилганларини кўрдим. Кўйлақларининг ёни эса ямоқли эди». (Дирҳам (қадимги кумуш танга) = 2,975 гр ≈ 3 гр).

Қаранг, ямоқли либос ичида Пайғамбаримиз соллаллоҳу алайҳи васаллам кўпроқ яхши кўрган, биз мўминларнинг онаси саналган Оиша розияллоҳу анҳо ҳам бор эканлар.

Аллоҳ таоло барчамизни Ўзининг ҳидоятидан айирмасин ва хотимамаизни чиройли қилсин!

Нозимжон Ҳошимжон